

Gereformeerde Kerk Bellville – 25 Februarie 2018 – Aand

Sing vooraf staande: Psalm 116:7, 8, 9 (p. 570)

- 7 Wat kan 'k die HEER vir al sy guns vergeld? / Wat kan 'k Hom bring uit dank vir sy genade?
Ek sal Hom prys vir sy verlossingsdade / en by die kelk van heil sy Naam vermeld.
- 8 Al my geloftes, uitgespreek in nood, / sal ek betaal as ek voor U mag nader
en met u gunsvolk in u huis vergader. / Hoe kost'lik, HEER, is in u oog hul dood!
- 9 Ag, HEER, ek is, o ja, ek is u kneg, / seun van u diensmaagd, in u diens gebore:
my bande^ois los; vir hoër diens verkore, / bring ek die offers, aan U toegeseg.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Loflied: Psalm 66:1, 2 (p. 320)

- 1 Juig, aarde, juig met blye galme, / laat jubels opstyg uit die stof!
Sing tot Gods eer jul dankb're psalme, / en maak Hom heerlik in jul lof.
Sy grootheid ken geen maat of perke, / geen grens is daar vir sy gesag;
die vyand sien met skrik sy werke / en buig hom kruipend voor sy mag.
- 2 Die aardryk met sy verste lande / moet biddend voor die HERE buig;
die volke van die verste strande / moet met hul lofstem voor Hom juig.
Kom en aanskou Gods wonderdade, / wat is sy werking hoog gedug.
Smeek Hom, o volke, om genade, / want niemand kan sy hand ontvlug.

Gebed

Psalm 66:5, 6 (p. 321)

- 5 U het, o HEER, deur vyandshande / ons in die vangnet ingevoer;
U het rondom met enge bande / in diensbaarheid ons ingesnoer;
die oorlogspersd en sy beryder / het ons vertrap; deur vloed en vuur
het ons gegaan – maar ons Bevryder / het sy verkwikking ons gestuur.
- 6 Ek sal, verlos uit doodsgeware, / nou dat ek weer kan asemhaal,
my offers bring op u altare / en my geloftes U betaal.
Ek sal laat opgaan in die vlamme / die vetste vee uit veld en wei;
ek sal by rookwerk van die ramme / ook beeste^oen bokke toeberei.

Skriflesing: Psalm 66

Kernverse: Psalm 66:13-14

**Ek sal met brandoffers in u huis ingaan; ek sal U my geloftes betaal,
wat my lippe geuit en my mond uitgespreek het toe ek benoud was.**

(Psalm 66:13-14 AFR53)

Tema: 'n Gelowige se dankbare antwoord op die Here se verlossingswerk

Geliefde gemeente van ons Here Jesus Christus, ons het vanoggend die voorreg gehad om aan die tafel van die Here te kon sit. 'n Week gelede het ons aan die hand van Psalm 15 besef dat ons nie sommer in die teenwoordigheid van die Here kan kom nie, wat nog te sê om op die heilige berg van die Here te woon. Die Heilige Gees het egter kragtig in ons gewerk met die Woord van die Here, sodat ons eerlik ons skuld voor die Here bely het en onself kon reinig om in die teenwoordigheid van die Here te kom. En die Here het ons

vanoggend aan sy tafel ontvang waar Hy ons verseker het dat Hy ons sondes vergewe het ter wille van Jesus Christus.

Omdat die Heilige Gees ons weereens oortuig het dat ons lewe slegs in Jesus Christus geborge is, het ons in die geloof aan die vaste belofte van God vasgegryp. Ons het egter nie net aan die belofte vasgegryp nie. Met ons opgaan na die tafel van die Here het ons gesê dat ons die belofte van die Here glo. Hy het ons werklik in Christus verlos. Die minste wat 'n mens nou kan doen, is om vir die Here dankie te sê. Trouens, ons het met ons aansit aan die tafel die voorneme uitgespreek dat ons met ons hele lewe dank aan God gaan bewys, opreg voor Hom gaan wandel en in ware liefde en eensgesindheid met ons naaste lewe.

'n Mens kan so 'n voorneme nie sommer ligtelik uitspreek nie. En ons vertrouwe is dat elkeen wat aan die tafel van die Here aangesit het, bedoel het wat hulle gesê het. 'n Ware gelowige doen en sê mos nie iets net om fatsoenlik voor te kom nie. Elke ware gelowige is in sy hart verseker dat God sy smeekgebed verhoor het. Daarom gaan hy die Here se verlossingswerk aan hom met 'n lewe van dankbaarheid beantwoord.

Broers, susters en kinders, ons is van die Here se genade afhanklik dat Hy tog ons smeek-gebede sal aanhoor. Ons is afhanklik van sy troue liefde om ons te vergewe ter wille van Christus. En selfs vir die voorneme wat ons uitgespreek het om dankbaarheid aan God te bewys, is ons van Hom afhanklik. Laat ons daarom luister hoe wil die Here dat ons dank aan Hom sal bewys.

Die agtergrond van Psalm 66 is aan ons onbekend, maar uit die inhoud van die psalm kom 'n mens tog agter hierdie is 'n enkeling wat in tyd van nood geloftes aan die Here gemaak het en hy gaan dit nou aan die Here betaal. Nou is dit tog opmerklik om te sien waar hierdie gelowige begin wanneer hy oor die betaal van sy gelofte praat. Dit gaan nie oor hom of oor wat met hom gebeur het nie. Die grootste deel van die psalm word gewy aan God en wat God gedoen het.

Die Here word geloof en geprys oor die verlossing wat Hy aan hierdie enkele kind van Hom gegee het. Maar hierdie gelowige is nie 'n losstaande enkeling wat maar alleen die Here prys en hom alleen aan die Here toewy nie. Hierdie gelowige is deel van die volk wat aan die Here behoort. Daarom plaas hy sy lof teen die agtergrond van die ontsagwekkende werk wat die Here in die geskiedenis van sy volk gedoen het.

Dit is ook nie net die verbondsvolk wat saam met hierdie enkele gelowige die Here moet loof en prys nie. Almal op die aarde moet juig tot eer van God, want die werke wat die Here doen, het nie net ten doel dat sommige Hom moet erken as God nie maar dat almal op die aarde Hom sal bely as God.

In een sinnetjie noem hy die magtige werk van die Here toe Hy sy volk uit Egipte verlos het en veilig in die beloofde land ingelei het. Uit die greep van die magtige Egipte met sy der-duisende strydwaens en soldate het die Here sy volk, wat in die oë van die wêreld maar net slawe was, laat trek. En om sy mag ten toon te stel vir Israel en Egipte en die hele wêreld lei die Here sy volk reguit na die Rooi See toe. Met net die beweging van Moses se staf kloof die Here die see oop sodat sy volk droogvoets daardeur kon trek. En toe hulle deur is, het die Here die Egiptenaars in daardie selfde see verdrink sodat Israel en Egipte en die hele wêreld kan weet dat die Here God is.

Veertig jaar later kloof die Here die Jordaanrivier oop met die voete van die Leviëte sodat die volk weereens droogvoets deur die rivier kan gaan en kan besef hoe magtig die Here

is. Destyds het die volk gejubel oor hierdie magtige werk van die Here. En hierdie lof en prys-liedere is onderrig aan almal op aarde. Almal op aarde moet weet dat geen volk, maak nie saak hoe sterk of hoe groot hulle ook al is nie, nie bestand is teen die Here wanneer Hy besluit het om sy volk te verlos nie. Daarom moet die vyande van die Here en van sy volk hulle nie teen God verset nie. As Hy verlos, doen Hy dit met mag en krag en niks kan Hom keer nie.

Selfs gedurende die veertig jaar in die woestyn was die Here se hande rondom sy volk gevou. Hy het kos en water voorsien sodat hulle kon lewe. Hy het hulle getug sodat hulle nie struikel en van Hom afvallig word nie. Die sonde en die duiwel het nie die oorhand oor Israel gekry nie. Op hulle woestynreis het die Here hulle gelouter soos silwer. Deur die tug met swaarkry het die Heilige Gees die volk van die Here gereinig soos met vuur en water om hulle van hulle sondes te laat afsien. Uiteindelik het die Here sy volk in die land van oorvloed ingelei om dit in besit te neem.

Die Here se magtige daade word nie net in die geskiedenis van 'n volk raakgesien nie maar ook in die geskiedenis van 'n enkeling. Die Here skenk sy redding nie net aan een groot groep gelowiges en vergeet maar van die enkeling nie. Die digter van hierdie psalm getuig dat die Here ook na die roepstem van die enkeling luister. Hy het in sy nood tot die Here geroep en God was getrou; Hy het hom ook verlos. In sy benoudheid het hy nie ondergegaan nie; sy sonde het ook nie die oorhand oor hom gekry nie.

Wonderbaarlik is die verlossingsdade van die Here. Toe daar menslik gesproke nie uitkoms was nie, het die Here die verlossing geskenk. So het die Here dan ook in ons eie lewens gedoen. Ons kon nie ons eie skuld betaal nie. En boonop het ons eenvoudig nie die vermoë om sondeloos te bly nie. Ons is te swak om alleen weerstand te bied teen die aanslae van ons eie sondige geaardheid. Wat nog te sê om alleen weerstand te bied teen die aanslae van die wêreld en die duiwel. Dit is alleen deur die krag van die Heilige Gees dat 'n gelowige weerstand teen die verleidings kan bied en die sonde oorwin. Dit is alleen deur die genade van die Here dat 'n gelowige se geloof in die Here kan standhou. Dit is slegs op grond van die Here se genade dat ons in die nagmaal die versekering gekry dat ons skuld werklik vergewe is. Daarom bely ons almal dat die Here se werke ontsagwekkend is. As die Here besluit het om te verlos, sal niemand kan keer nie. Uit elke stam, volk en taal sal die Here sy uit-verkorenes verlos uit die greep van die sonde en die duiwel.

Dit is egter nie net die gelowige digter van ons psalm wat van hierdie wonderbare verlossing van die Here kan getuig nie. Elkeen van ons kan ook daarvan getuig. Die Here luister nie net na die stem van duisende gelowiges wat op een slag in gebed Hom aanroep nie. Hy luister ook na die gesmeek van ons enkelinge. Baie van ons is al uit die greep van armoede en ellende gered deur die Here. Almal van ons is al deur die hand van die Here in die lewe gehou tydens ernstige siektes. Sommige van ons word tans so deur die Here in die lewe gehou terwyl hulle siek is sodat hulle nie die Here sal los en Hom verloën nie. Almal van ons is al deur die Here uit die greep van die sonde verlos.

En al hierdie verlossingswerke wat die Here vir Israel, vir die kerk en vir ons enkelinge al gedoen het, is gewortel in die verlossingswerk van Jesus Christus. Die ontsagwekkende van God se verlossingswerk in Christus is juis die wyse waarop Hy dit kom doen het. Die sondelose Lam van God kom sterf self vir sondaars en Hy staan uit die dood uit op sodat daar redding kan wees vir ons. Christus het persoonlik vir sy volk gesterf en opgestaan sodat elke lid van sy volk ook in hulle persoonlike nood op Hom kan vertrou. Jesus verhoor die gebed van elke enkeling wat tot Hom vlug.

En waar die Heilige Gees met die Woord van die Here die redding van Jesus Christus in die hart van 'n sondaar indra, kan niks en niemand keer nie. By so 'n mens vind die wedergeboorte plaas en kom daar geloof en bekering. Die duiwel en die sonde sal nie die oorhand in die lewens van God se uitverkorenes kry nie. Daarom lei die Heilige Gees daaglikse nog elke gelowige deur loutering en bekering heen om van die oorblywende sondes ontslae te raak om uiteindelik in die oorfloed van die hemelse koninkryk in te gaan.

Geliefde gemeente, die Heilige Gees lei ons in hierdie psalm om net tot een logiese slotsom te kom. Vir die reddingsdade van die Here moet ons Hom loof en prys. En die geloftes wat in nood uitgespreek is, moet aan die Here betaal word. Vir die Psalmdigter het dit beteken dat hy met brandoffers na die huis van die Here opgaan om daarmee sy dank en lof direk aan die Here te bring vir die verlossing wat hy ontvang het.

Vir die persoonlike verlossing wat die Here aan elkeen van ons skenk, vir die leiding van die Heilige Gees wat elkeen van ons ontvang om in nood en stryd staande te kan bly in die geloof, vir die oorwinning oor die sondes wat ons ontvang, is dank en lof aan die Here die enigste spontane en ware antwoord wat ons kan gee. In gebed en psalmgesang bring ons eer aan die Here vir die magtige verlossingswerk wat Hy in ons lewens tot stand gebring het. Ons offer nie meer beeste en bokke in die voorhof van die tempel aan die Here nie, want die Here Jesus se bloed is die laaste bloedoffer wat vir die Here gebring is. Nou offer ons ons eie lewens, ons liggaam, ons kragte, ons vermoëns en talente aan die Here. Met alles wat ons doen en sê, betuig ons ons dank aan die Here dat ons in sy diens kan bly lewe.

Vir die magtige verlossingswerk wat die Here gedoen het in jou en my lewe kan ons nie anders nie as om dank en lof aan die Here te bring nie. Dit is dank en lof nie omdat die Here my en jou lewe van 'n oormag van vyande gered het nie. Nee, dit is dank en lof aan die Here omdat Hy sy beloftes in Jesus Christus ook vandag waar maak het. Ondanks ons swakheid en ondanks die oorblywende sonde waarteen ons nog stry, het die Here ons sondes vergewe. Ons bring dank en lof aan die Here dat Hy steeds in elkeen van ons werksaam wil wees en bly sodat ons hoe langer hoe meer uit die greep van die sonde kan kom en bly.

Maar dit is nie net hier in die erediens of in ons binnekamer waar ons in gebed en psalmgesang lof en eer aan die Here bring vir sy verlossingsdade nie. Ons dankbaarheid gaan veel verder as dit. Ons dankbaarheid kom ook daarin uit dat ons die digter van ons psalm navolg deur almal rondom ons bymekaar te maak om vir hulle te vertel van die verlossings-dade van die Here in die geskiedenis van Israel, van sy kerk en van ons eie lewens. Getuig van hoe die Heilige Gees harde harte sag maak het, en ongelowiges tot kinders van God verander het. Getuig van die genade wat die Here aan ons bewys het, want so word die lof en dank aan die Here gebring vir dit wat Hy alleen kan doen.

Geliefdes, omdat ons nagmaal gevier het en deur die Here aan sy tafel verseker is dat ons sondeskuld geheel en al weggewas is deur die bloed van Christus, staan ons onder 'n verpligting. Hierdie verpligting is nie teenoor mense of selfs teenoor die kerkraad nie. Dit is die verpligting wat ons op onself geneem het toe ons ons voorgeneem het om met ons hele lewe dank aan God te bewys, opreg voor Hom te wandel en in liefde en eensgesindheid met ons naaste te lewe. Ons is dank aan die Here verskuldig vir die verlossingswerk wat Hy in en aan ons gedoen het.

Mag die lof en dank vir die Here se genade aan ons so uit ons lewens weerklank – ja, uit ons lewens weerklank en nie net uit ons monde nie – dat die mense rondom ons, saam met ons, kan juig oor die genade van God. Ons lof en dank weerklank uit ons lewens wanneer ons opreg voor die Here lewe. Dit wil sê wanneer ons bedag is op alles wat ons doen en sê sodat die Here daardeur verheerlik sal word. Ons lof en dank weerklank ook wanneer ons in liefde en eensgesindheid saam met geloofsgenote lewe en, vir sover dit vir ons moontlik is, in vrede lewe met alle mense. Mag die Here ons deur sy Gees daartoe help, want uit ons eie uit gaan ons dit nie regkry om die Here te dank nie.

Amen!

Slotgebed

Psalm 66:7, 9 (p. 322)

- 7 Kom luister toe, o Godgesinde! / Kom, almal wat die HERE vrees!
Ek sal vertel aan al sy vrinde / wat Hy gedoen het aan my gees.
Ek het geroep, God het geluister / toe alles nag was om my heen;
en voor die lig skyn deur die duister, / was God my lof, net Hy alleen.
- 9 Lof sy Gods goedertierenhede, / sy Naam sy ewig lof en prys!
Hy het gehoor na my gebede, / my onverhoord nooit afgewys.

Die HERE sal jou seën en jou behoed;
Die HERE sal sy aangesig oor jou laat skyn en jou genadig wees;
Die HERE sal sy aangesig oor jou verhef en aan jou vrede gee.

Amen.

Ds Coen Vrey
Gereformeerde Kerk Bellville
25 Februarie 2018